

Evening Dogri (NSD) Bulletin 18-05-2024

आकाशवाणी

खास खबरां.....

1 लोकसभा चुनावें दे 5में गेड़ लेई चुनावें प्रचार अज्ज मुक्की गेआ। इस गेड़ तैहत् 49 सीटें पर वोट पोआए जांगन।

2 प्रधानमंत्री नरेन्द्र मोदी होरें आखेआ जे धारा 370 हटने मगरा कश्मीर विकास दी बत्ता पर अगो बधा'रदा ऐ।

3 दिल्ली पुलिस नै स्वाति मालीवाल उप्पर कथित हमले सरबंधी मामले च दिल्ली दे मुखमंत्री अरविंद केजरीवाल हुंदे साथी वैभव कुमार गी गिरफ्तार करी लैता ऐ।

4 भारत ते संयुक्त अरब अमिरात बश्कार भारत-मध्य-पूर्व ते यूरोपी आर्थिक कोरीडोर बारे पैहले चरण दी गल्लबात समाप्त होई गई ऐ।

5 बैडमिंटन च भारत दे चिराग शेटी ते सात्विक साईराज रंकी रेड्डी दी जोड़ी थाईलैंड ओपन च मर्दे दी फाइनल च पुज्जी गई ऐ।

6 आईपीएल क्रिकेट च अज्ज रॉयल चैलेंजर्स बैंगलुरु दा मकाबला चिन्नेई सुपर किंग्स कन्नै होग।

<><><><><><>

Campaign

लोकसभा चुनावें दे 5में गेड़ लेई जारी प्रचार मुहिम अज्ज मुक्की गेआ, इससै गेड़ तैहत् बरामुला चुनावी हल्के च वोट पोआए जांगन। 49 लोकसभा सीटें जिंदे च बिहार दियां 5, झारखंड दिएं 3, महाराष्ट्र दियां 13, ओडिशा दियां 5, उत्तर प्रदेश दी 14, पच्छिम बंगाल 7 ते केन्द्र शासत प्रदेश जम्मू कश्मीर ते लद्दाख दी 1-1

सीटें उप्पर 20 मई गी वोट पोआए जांगन। बारामुला चुनावी हल्के थमां 22 मेदवार चुनां मैदान च न। पर मुख मकाबला नैशनल कांफ्रेंस दे उप-प्रधान उमर अब्दुल्ला जेकेपीसी दे प्रधान सज्जाद गनी लोन ते तिहार जेल च बंद इंजीनियर रशीद हुंदे बश्कार ऐ। इस लोकसभा चुनावी हल्के च चऊं जिलें कुपवाड़ा, बारामुला, बांदीपोरा ते बडगाम दियां 18 विधानसभा क्षेत्र शामिल न। 2019 ब'रे दे चुनावें च 4 लख 57 जहार 931 वोट पे हे, जिंदे चा सब्बै शा मते वोट 1 लख 33 जहार 426 वोट नैशनल कांफ्रेंस दे एम.ए.लोन होरें हासल कीते हे, उंदे मगरा पीपल्स कांफ्रेंस दे राजा एजाज अली होरें 1 लख 31 जहार 193 वोट हासल कीते ते इंजीनियर रशीद गी 1 लख 21 जहार 168 वोट हासल कीते हे। उआं इस बारी 3 दहाके मगरा चुनावें दा पूरा मंजर बदली गेआ ऐ। बारामुला च बक्ख-बक्ख रैलियां ते रोड शो होआ'रदे न ते लोकें च वोट पाने गी लेइयै बड़ा मता चाह दिक्खने गी लब्भा'रदा ऐ। जम्मू कश्मीर थमां दफा 370 दे हटने मगरा एह पैहले लोकसभा चुनां न।

<><><><><><>

Baramula

लोकसभा चुनां दे 5में गेड़ तैहत 6 राज्यें ते दो केन्द्र शासत प्रदेशें च औंदी 20 मई गी 49 लोकसभा सीटें लेई वोट पोआए जाने न। एहदे तैहत 26 जहार पंजीकृत कश्मीरी पंडत मतदाताएं शा 18 जहार शा मते विस्थापत वोटरें गी अपने वोट पाने दे हक्क दा इस्तेमाल करगंन। आकाशवाणी जम्मू दे संवाददाता होरें जानकारी दित्ती ऐ जे बारामुला-कुपवाड़ा हल्के च 26 जहार विस्थापत वोटरें चा 12 जहार 926 मर्द ते 13 जहार 74 महिला वोटर न। 18 जहार वोटरें गी चुनां अधिकारिएं आस्सेआ अपडेट कीता गेदा ऐ जेहड़े औंदी 20 मई गी वोट पांगन। चुनां प्रशासन नै विस्थापत वोटरें लेई 29 मतदान केन्द्र स्थापत कीते न, जिंदे चा 24 जम्मू च, 4 दिल्ली ते 1 मतदान केन्द्र उधमपुर च ऐ। दिल्ली च कश्मीरी पंडत वोटरें लेई बडलै 6 बजे शा संजा 6 बजे तगर पिक एंड ड्राप दी सुविधा बी उपलब्ध होग। चुनां प्रशासन नै इस बारी इस गल्ला गी जकीनी बनाने दे पूरे

जतन कीते न, मते शा मते विस्थापत वोटर अपने वोट पाने दे हक्क दा इस्तेमाल करी सकन। पिछली बारी केई विस्थापत वोटरें दा नां मतदाता सूचिएं च नेई हा। जम्मू च बी विस्थाप वोटरें लेई जगटी, उदयवाला ते बोहड़ी च मतदान केन्द्र स्थापत कीते गेदे न।

<><><><><><>

Modi-370

प्रधानमंत्री ते बीजेपी दे वरिष्ठ नेता नरेन्द्र मोदी होरें आखेआ ऐ जे केन्द्र च इक मजबूत सरकार होने करी गै दफा-370 दी कंध गी त्रुडेआ जाई सकेआ ऐ ते नतीजन हुन कश्मीर तेज रफतार कन्नै विकास-बाद्धे दी बत्ता पर अगड़ा बधै करदा ऐ। अज्ज हरियाणा च इक चुनावी रैली गी संबोधत करदे होई मोदी होरें आखेआ जे अगस्त 2019 च भारती जनता पार्टी दी अगुवाई आली केन्द्र सरकार नै दफा-370 दे प्रावधानें गी हटाई दित्ता हा। उनें दावा कीता जे इक गैह कन्नै प्रदेश च रमानदारी स्थापत करने च मती मदाद हासल होई ऐ। उनें दोष लाया जे कांग्रेस पार्टी नै वोट बैंक दी सियासत लेई राश्ट्री सुरक्षा कन्नै समझौता कीता।

<><><><><><>

Delhi Police

दिल्ली पुलस नै आम आदमी पार्टी दे सांसद स्वाति मालीवाल उप्पर कथित हमले सरबंधी मामले च दिल्ली दे मुखमंत्री अरविंद केजरीवाल हुंदे साथी वैभव कुमार गी गिरफ्तार करी लैता ऐ। उसगी गिरफ्तार करियै सिविल लाईन्स पुलस थाने आन्नेआ गेआ ऐ। एहदे शा पैहले सांसद स्वाति मालीवाल नै 13 मई गी वैभव कुमार आस्सेआ केजरीवाल हुंदे घर कथित तौरा पर कीते गेदे उत्पीड़न नै बदमीजी दी शकैत दर्ज कराई। श्रीमती मालीवाल खलाफ शकैत दर्ज कराई जे

ओह घटना आले दिन गैर कनूनी ढंगै कन्नै श्री केजरीवाल हुंदे घर दाखल होइयां हियां ।



India-UAE

भारत दे इक उच्च स्तरीय डेलीगेशन नै भारत-मध्य-पूर्व ते यूरोप बश्कार आर्थिक कारीडोर विकसित करने आली महत्वकांक्षी परियोजना बारे संयुक्त अरब अमिरात दे ऐहलकारें कन्नै पैहले चरण दी गल्लबात मुकम्मल करी लैती ऐ। इक अंतर-मंत्रालय दल जेहदे च जहाजरानी मंत्रालय, बंज बपार ते उद्योग, एक्साइस ते कस्टम सरबंधी केन्द्र बोर्डें ते दीनदयाल उपाध्या बंदरगाह थमां वरिष्ठ ऐहलकारें 15 थमां 17 मई बश्कार यूएई दे प्रमुख बंदरगाहें दा दौरा कीता। अपने दौरे दरान उनें खलीफा बंदरगाह, पुजाइरहा बंदरगाह ते जेवेल बंदरगाह दे शीर्ष ऐहलकारें कन्नै भारती समेयान गी मध्य-पूर्व ते यूरोप दे बजारें तोड़ी पजाने लेई आर्थिक कारीडोर दी सुविधा देने बारे विस्तार च चर्चा कीती।



EC-Delhi

बुर्जुगें ते दिव्यांगजनें लेई घरै च गै मतदान दी सुविधा देने आली मुहिम दे दुए ध्याड़े दिल्ली व 1 जहार 409 जनें वोट पाया। दिल्ली च कुल 5 जहार 406 मतदाताएं फार्म 12डी भरियै लोकसभा चुनां 2024 दरान घरें च मतदान दी सुविधा लेई आवेदन कीता हा। आकाशवाणी संवाददाता नै खबर दित्ती ऐ जे घरे च वोट पाने दी सुविधा दिव्यांगजनें ते 85 ब'रे थमां बद्ध बरेसू दे बुर्जुगजनें गी दित्ती जा'रदी ऐ। एह मुहिम 16 मई गी शुरू होग ते 24 मई तोड़ी चलोग। दिल्ली च 25 मई गी मतदान होग।



Army Commander

फौज दी उत्तरी कमान दे प्रमुख लैफ्टिनेंट जनरल एम.वी.सुचिंदरा कुमार होरें अज्ज दक्खनी कश्मीर च सुरक्षा स्थिति ते आतंकवाद-रोधी ग्रिड दे कम्मकाज दा जायजा लैता। सोशल नेटवर्किंग साईट एक्स पर जारी इक पोस्ट च उत्तरी कमान नै दस्सेआ जे फौजी कमांडर होरें आतंकवाद-रोधी ग्रिड ते बल दिएं कारवाइएं मतल्लक तैआरिं बारे जानकारी दित्ती गई ऐ। फौजी कमांडर होरें बलें गी लगातार सतर्कता बनाई रखने ते दुश्मन दे भैडे मंसूबें गी नाकाम बनाने लेई आखेआ ऐ।



Badminton

बैडमिंटन च थाईलैंड दी बैंकाक थाहर खेड्डी जा'रदी थाईलैंड ओपन बैडमिंटन प्रतियोगिता दे सैमीफाइनल च भारती खडारी चिराग शेट्टी ते सात्विक साईराज रंकी रेड्डी दी जोड़ी नै ताईवान दे एम.सी.लू ते टैंग कार्ई दी जोड़ी गी 21-11, 21-12 कन्नै हराइयै फाइनल च थाहर पक्की करी लैती ऐ। फाइनल च उंदा मकाबला लियू ही ते चैन बोहेंग दी जोड़ी कन्नै होग।



IPL

आईपीएल क्रिकेट च अज्ज रॉयल चैलेंजर्स बेंगलुरु दा मकाबला चिन्नेई सुपर किंग्स कन्नै होग। दौनें टीमां जितत दे कन्नै पले ऑ च खाली पेदे खीरी थाहर हासल करने आलियां न। चिन्नेई सुपर किंग्स जित्त दे कन्नै सिद्दे प्ले ऑफ च पुज्जी जाग जदके रॉयल चैलेंजर्स बेंगलुरु गी पले ऑफ च थाहर बनाने लेई जित्त दे कन्ने नैट रनरेट च बी सुधार करना पौग।

